

I E

num. 160.

LIVRE DES PRESAIGES DV

DIVIN HYPOCRA.
tes diuisé en troys parties.

Item.

La protestation, que le dict Hyppocra-
tes faisoit faire à ses disciples.

Le tout nouuellement translaté par maistre Pierre
Vernei, Docteur en Medecine.

A D A M V S S I M D O L O ,

S C A E R A , E T I M P O L I T A




A T Q V E P E R P O L I O ,



A LYON,
Chés Estienne Dolet.

76863





LA VIE D'HYPPOCRA-
TES.

HYppocras fut filz de Eraclides, comme tesmoigne Galien au premier liure du regime des maladies agues: combien que aucuns disent, qu'il fut filz de Asclepius. Et fut engendré, & né en l'isle dicté Cos: et eut pour recteur, & maistre le grand Pithagoras. Quand à sa propriete naturelle, il auoit en hayne, et horreur, et abomination toutes pōpes, et uoluptés mondaines, & nenereiques charnalités: et contraignoit ses disciples par iurement d'estre taciturnes, et de garder silence, aussi modestie, et māsuetude, ou humilite tant en mœurs, qu'en habitz: et ce tesmoingne saint Hierome. Et restaura la science de Medecine perdue pres de cinq cents ans, asscauoir de puis Esculapius. Le dict Hyppocras fut petit de corps, et stature, mais beau, et elegant de forme: & auoit bonne, et puissante teste, & marchoit tardiuement, & tout beau, fort pensif, et de peu de parole, & tardieue, & n'estoit grand mangeur, ny gourmant. Il uesquit x c. v. ans, et son dicton estoit tel souuent: asscauoir, Qui ueult uiure en liberte, ne desire ce, qu'il ne peult auoir. Et qui ueult auoir ce, qu'il desire, et couuoite, desire tant seulement ce, qu'il peult auoir. D'auantage, qui ueult uiure pacifiquement en ceste uie mortelle, soit faict semblable à celui, qui est inuité à ung conuiuē, & banquet: lequel rend graces de tout ce, que lon met deuant luy, & ne murmure des deffaultz, & omissions. Et fut du temps de Eliachim, de Malachias prophete, de Zeno, et Socrates.

Cos est une isle en la mer egiotique une des sept Cyclades pres de Rhode, ou croist tresbon uin.

Mot dore d'Hyppocras,

Plus de quatre cents ans auant Iesu Christ.

LA PROTESTATION, ET
iurement du Diuin, & Maistre des
Medecins Hyppocrates.

En Pisle Cos
estoit ung tem
ple dedie à
Esculapius.



MOY Hyppocras pteſte, iure, & fais pro
meſſe au grand Dieu Apollo, ou Apol
lin, & à Eſculapius, & à ſes deux filles,
aſſcauoir Hygine, & Panacie: d'auãtã
ge à tous Dieux, & Deeſſes: au mieulx,
que me ſera poſſible, & tant, que mon eſprit pourra, &
entendement de obſeruer le contenu de ce iurement, ou
tablettes, eſquelles eſt inſculpé, graué, ou eſcript le dict
iuremẽt. Aſſcauoir que ie me rendz obligé, tributaire, &
debteur au precepteur, et docteur, qui m'a enſeigné, et m'i
ſtré ceſte ſcience, & doctrine: non moins, mais aultant, ou
plus, que au pere, qui m'a engendré: & debuoir avec luy
uiure, et communiquer, & ſuruenir en toutes les neceſſi
tés, que le cõgnoiſtray auoir, aultant que ma force pour
roit auoir, et biens ſe pourront eſtendre. Auſſi que auray
en amour, et charite ſes enfans, comme mes freres, & ſa
progenie comme la mienne. D'auantaige que ie enſeigne
ray, demonſtreray, et endoctrineray la dictẽ ſcience gra
tis, ſans pris, ny paction. Et que donneray tous les canõs,
regles, et preceptes ſans rien, cacher, ou celer libera
lement: & fidelement aux enfans de noſtre dict maĩſtre,
comme aux miens propres. Et à tous aultres diſciples,
leſquelz auront, ou uouldront faire tel ſerment, & iure
ment, et non à aultres. En oultre, que en practiquant,
et uſant de ma ſcience enuers les malades uſeray ſeu
lement

lement de choses necessaires aultant, qu'il me sera possible, & que mon esprit, & entendement se pourra estendre, et que le plus tost, que pourray, et le plus briefue-
ment, sans dilater, ni retarder la maladie gueriray les ma-
lades. Et que ne feray chose contre droict par hayne,
courroux, iniure, ou mal talent à personne, qui soit. D'a-
uantaige, que ne donneray poison: ne conseilleray, ou ap-
prendray à nulli la poison, ny la maniere: aussi que ne
bailleray, ou feray bailler, ne consentiray. estre donnée
chose à femme pregnant, ou ensaincte pour tuer, ou fai-
re uider le fruiet. Mais proteste de garder ma uie, et ma
science purement, nettement, & inuiolablemēt sans trom-
per, defrauder, ou faire tort à personne: & que ne taille-
ray, ou inciseray personne ayant la pierre, mais laisseray
la cure aux experts de ce. Et d'auantaige promeiz, que
ne entreray en maison de malade si non en intention de le
guerir, et que patiemment souffriray des malades in-
iures, abominations, et uomissementz, & toutes aultres
pouuretés, & que euitray de mon pouuoir toute chose
uenereique.

Item soit homme, soit femme, maistre, ou seruiteur
riche, ou pouure entre mes mains pour guerir de toutes
choses, que pourray ueoir, ou ouyr, soit en la, cure, ou en
mœurs, & que sera bon de celer, & taire, n'en ouuriray
ma bouche, mais intemeraire taciturnité garderay, &
à creature ne reueleray pour mourir. Et pource ie prie
à noz Dieux, que à moy ceste protestation, promesse,
& iurement obseruant integralement, & inuiolable-
ment, que toutes choses en ma uie, & en mon art, &

Cy demonstre
Hypocras Pa
me raisonna-
ble estre per-
petuelle, &
lieu de beai-
tude, & de pei-
ne infinie.

science fauſtement, ſalubrement, et bonnement aduiennẽt;
& en la fin gloire eternelle. Et à celuy, qui contreuie-
dra, tranſgreſſera, & ſera periure, tout le con-
traire luy aduienne, aſſcauoir, infelicite,
improſperite, malencontre,
et malediction
eternelle.

FIN DE LA PROTE-
STATION.

7

LE PREMIER LIVRE
des Presaiges du diuin
Hippocrates.

Prologue.



Ng Medecin desirant acquerir gloire,
& honneur par sa science: et l'amour des
gens, & amasser quelque bien, se doit
monstrer scauant, & expert. Et ce,

en adnonnant aux malades les acci-
dentz preteritz, presentz, & futurs de leurs maladies,
et declairât choses omises par iceulx malades, et aduertis-
sant, ou reduisant à memoire choses oubliées: ce, que con-
gnoissants les malades, plus hardimēt se mettrōt entre ses
mains, presumātz, et estimātz, qu'il a totale cōgnoissance
de toutes maladies, et que bien tost seront gueris. Ce qui
est uray: car ayant congnoissance telle des choses preteri-
tes, presentes, & futures peult plus facilement remedier
aux maladies. Combien qu'il soit impossible au Medecin
de restituer la sante, & guerir toust malades: ce qui seroit
chose plus grande, que predire les accidentz futurs. Car
il aduiēt aulcunes fois, que les malades meurent par la uio-
lence, & malignite de la maladie, auant que le Medecin
soit appellé: aulcuns meurent tost apres, que le Medecin
est arriué: le iour mesme. Aussi ung, ou deux iours apres,
auant que par sa science, & diligence puisse corriger, &
tollir le peril, & telz terribles accidentz. Parquoy se
doibt exercer, & efforcer de congnoistre la nature, &

G A L.
Pronostiques
combien que
soit chose
plus diuine
que humaine:
toutesfoys el-
le cause hon-
neur profit a'y
de a euitier dis-
fame ou blas-
me.

peruersité de telles infirmités: aussi la uertu du malade, affin de euitier calumnie, opprobres, et reproches.

GAL.
Je dis hardi-
ment, & non
temerairement
que Hippo-
crates par ce
mot celeste
ueult estre en-
tendu Paer
nous environ-
nant, & circun-
dant: pource
ie Pay ainsi
translate. Com-
me uoyez.

Ce qu'il fera, et se monstrera admirable, & plus di-
uin, que humain, predisant la mort à l'ung: la sante à l'autre,
ayant aussi esgart à la qualite, bonte, & malignité de
l'air tant particulier: asscauoir celui, qui est circundant le
malade, qu'en l'uniuersel: et le tēps en ses qualitez, et l'an
aussi les bōs, et mauuais aspects des corps celestes: ce pre-
uoyant euitera deshonneur, et acquerra bruit, & amys.

Icy commence à presagir par signes de la face.

OR doncques pour bien predire, preuoir, ou pre-
sagir, signammēt en maladies perilleuses, et agues,
est requis de cōsiderer, et speculer la face du malade. Pre-
mierement asscauoir si elle est telle, que en sante, ou que
peu s'en fault. Et si ainsi est, pourra le Medecin en auoir
bon presage, et estimation salubre. Mais aussi si elle est
grandement differente, et changée, comme s'ensuit, esti-
mera peril, et danger de mort. Quand le nez, et nari-
nes sont agues, et extenuées par icelle maladie: & les
yeulx concaues, et les temples, asscauoir les parties entre
les aureilles, et front sont descharnées, et la peau du front
est dure, seiche, et tēdue, et les aureilles froides, et restrain-
ctes, ou quasi renuersées, et toute la face apert noire, pas-
le, liuide, ou plombeuse, et grandement difforme à celle
du temps sante.

Quand les choses predictes apparoiſsent en la face, ou
la plus part au cōmencemēt, ou premiers iours de la mala-
die, il se fault enquerir (si par aultre indice lon ne peut)
si pre

si prouiennent poinct par trop ueiller, à scauoir que le patient n'a eu temps, ni opportunité de dormir, ou qu'il a eu flux de uentre naturel, ou les dictes choses son aduenues par famine: car si ainsi estoit, lon ne doit craindre peril. A l'opposite, si telle face precede, & perseuerer, & le patient dict, que les dictes choses n'aduennent par uigile, flux de uentre, ni par famine, le Medecin peult asseurement presagir mort prochaine. Et si la maladie ia auroit duré trois, ou quatre iours, apres auoir consideré ce, que dessus, il fault qu'il specule par aultres signes, comme des yeulx, & aultres parties du corps.

GAL.
Tu dois en-
tendre de tous
flux superflus
comme de sang
par natines:
par saignées:
par matrice,
par playe, ou
emorrhoides.

Les signes par les yeulx, & leures.

Car si les yeulx ne peuuent ueoir le iour, ou clarté, & larmoyent, ou pleurent contre nature, & malagre le personaige: aussi quand semble, qu'ilz ueuillent sortir hors de la teste, ou que l'ung est euidentement amoindri, & diminué, ou que le blanc des yeulx est rouge, & apparoiſſent ueines rouges, ou liuides, ou qui sont lippeux, & chassieulx, ou tremblantz, & fort mobiles, ou enfoncés, & parfondz. Aussi quand le malade devient lousche, & regarde de trauers, & a terrible regard, & obscur: & qu'il a la face toute cōtrefaite, & espouuanteable. Tous ces signes cy sont pernicieux, & mortelz. D'auantage quand le patient dort quasi les yeulx ouuerts, & n'a ce de coustume, & le blanc des yeulx se monstre, seulement les paulpieres entrecloses, & ce n'aduient par flux de uentre, ou par medecine solutiue, c'est signe de mort. Item quand les paulpieres, aussi les leures, ou babines, & le

nez semblent estre tortuz, ou renuersés, aussi mortifiés, ou liuides, ces signes avec les precedents iugēt le malade à mort. Item quand les leures sont descharnées pendentes, froides, & pasles contre la nature du malade, pourra le Medecin presagir, & prenostiquer la mort prochaine.

De la maniere de gesir, ou coucher.

Quant au coucher, c'est tres bon signe, quand le patient repose, & dort sus le costé dextre, ou senestre, à son ayse les mains sur son estomach, ou ailleurs, non roides, ne les iambes aussi: mais flexibles, & gesir, cōme en sante, est singulier. Car gesir le col, les mains, & piedz roides, & estēduz, nō flexibles, n'est louable, ne bon. Item quād le malade se tourne, uire, rēuerse souuēt en sur sault en ueillant, ou dormant: & des piedz du liēt faict le cheuet se deiectāt, & ne scayt, qu'il faict, est mauuais signe. D'auantaige si se descouure souuent n'ayant grande chaleur aux extremités, & qui deiecte ses bras, iābes, piedz, & teste tantost ca, tantost là, c'est signe, qu'il est en grosse angouisse, & destresse. Item est pernicieux signe dormir la bouche ouuerte cōtre nature. Aussi dormir la face en hault ayāt les iambes entrelasées, & entortillées quasi comme chordes, & ce par la force, et uiolence de la maladie, est mauuais signe, ou aussi cōtre raison fort eslargiēs. Item celuy, qui contre nature, & non de coustume dort le uentre en bas contre le liēt serré, note, & signifie permixtion d'entendēmēt, & alienation, ou grosse raige, & douleur de uentre. D'auantaige quiconque au iour de

cretica

cretication, & force de la maladie se contrainct, et efforce de soy leuer, et tenir droit, et n'est pacifique, se met en danger, et est mauuais signe en toutes agues, & grosses maladies: mais pire en pulmoniques passions.

Des signes par les Dentz.

Quand lon grinsse les dentz (non point comme ung homme, qui grosse froideur, mais par collision) en la fiebure, & que lon ne l'a de ieunesse, ou de cōstume, ce signifie trēblemēt d'esperit, et de raison, aussi mort. Et si tātost est desraisonné, et aliené, signifie mort pchaine.

Du signe de mort par vlcere.

S'il suruiēt au malade ulcere, antrax, ou charbō, soyt qu'il precede la maladie, ou qu'il uienne avec la maladie. Si ulcere deseiche, et deuien ne uert, liuide, ou noir, & apercois le malade empirer, pourras prenostiquer mort prochaine

Des signes par les Mains:

Quand le febricitant de fiebure ague, ou en maladie du poulmon dictē peripneumonic, ou en frenesie bastarde, & nō uraye, ou en grosse douleur de chef cherche ca, & là en hault, en bas, & sur le liēt comme poilz, et cheueulx de la face, aussi plumes, ou ordures des conuertures, aussi paille, festus, et aultre chose, pense prendre contre les parois, et murs, sont tout signes mortelz.

Les signes par L'Aleine; ou Aspiration.

L'Aleine, ou respiration frequente signifie douleurs, ou inflammation, & ardeurs aux membres spirituelz, comme du cuer, & poulmon. Mais quand elle est grande, & rare, qu'il y a grande espace entre les respirations, signifie alienation d'entendement, & de raison, & quād l'aleine sort de la bouche, & des narimes fort froide, note gros perilz, & mort. Mais la facile aspiration, et respiration, en ague maladie la fiebure concomitante, & iointe, est signe salutaire: en celles, qui se terminent dedans quarente iours.

Prenostique par la Sueur.

LA salubre, louable, & bonne sueur en toute maladie ague est celle, qui uient en iour de cretication, ou iudiciaire, & signamment quand est uniuerselle, & le patient s'en trouue allegé, & plus fort. Et si n'dauient aux dictz iours, & ne soit uniuerselle, n'est bõ signe: mais la mortelle sueur est particuliere, & froide, comme au frõt seulement, chef, ou face: & ce en fiebure ague, & en aultre maladie denote diurnite, et proxilite de maladie.

Du costé droit, & gauche.

Quand le patient ne sent aucune douleur, tumeur, durte, ou inflammation soubz les costés, c'est bon signe, et que l'ung des costés est aussi mol, que l'aultre sans douleur. A l'opposite, s'il y a douleur, tumeur, durte, ou inflammation

inflammation es deux costés, ou en l'ung plus, que en l'autre, lon peult presumer mal. Car si lon sent grand deba-
tement, ou pulsation en l'ung des costés, lon peult preno-
stiquer grosse destresse, et douleur, ou alienation, et per-
mixtion de raison. Et si avec ceste pulsation les yeulz
sont fort mobiles, le patient est en danger de raige, et de-
uenir enraige, ou demoniacle, ou de soy destruire.

Des signes par Apostumes soubz les costés:

LA collection, ou apostume en ague maladie soubz
les deux costés avec tumeur, et douleur est plus dan-
gereuse, que soubz l'ung des costés seulement: & princi-
palement moins perilleuse soubz le costé gauche, que
soubz le dextre. Et si le patient ne meurt es premiers
iours, et qu'il dure iusque a xx. iours, et la fiebure ne ces-
se, ni l'apostume diminue, c'est signe, qu'il uiendra à ma-
turation. Et s'il aduient au vii. iour, ou enuiron flux de
sang par le nez, ce allege bonnement. Ce pourra prenosti-
quer le Médecin, quand le patient dict, que le front luy
faict mal, ou chef, et a les yeulx calligineux, et chassieux,
et principalemēt quand le patiēt ne passe xxx. ou xxxv.
ans. Et quād la collection, ou apostume est molle, et sans
douleur, et se meut, ou uarie, quand on touche sus elle,
meēt plus long temps à guerir, que la precedente: mais
n'est si dangereuse. Et si elle dure, et perseuere iusques à
lx. iours, et la fiebure ne cesse, ni la tumeur ne diminue,
elle uiendra à maturation, et purgation: aultant en pre-
nostiqueras des apostumes du uentre. L'apostume don-

GAL.
Car le foye
est au droit co-
sté, & la rate
au senestre: p-
quoy est pi-
re au dextre,

GAL.
Les nouue-
aux Mede-
cins l'appellent
vndimie, &
zimie,

ques grande, dure, avec grosse douleur est dangereuse, et mortelle : la molle, et sans douleur, et uoluble de lieu en aultre est plus tardive, mais sans comparaison moins dangereuse.

Des apostumes du bas uentre.

Les apostumes du uentre iamais ne deuiennent si grandes, ne si grosses, que celles, qui se cōgrent soubz dyaphragme. Et encores moindres sont celles, qui se congregent soubz le lombril, et peu souuent uiennent à suppuration, ou putrefaction. Mais c'est bon signe, quand se purgent par flux de sang de la narine de la part de l'a postume.

Item toutes telles apostumes par laps de temps, et à la fin pourroient paruenir à putrefaction, et purgation par la maniere, qui s'ensuit.

il est doncques conuenable de considerer, que les pre nommées collections, ou apostumes par diuerses manieres uiennent à putrefaction, et purgation. Car les unes se purgent par dehors totalement. Et sont petites, rondes, et agues, ou pyramidales : icelles sont les plus salubres, et moins letales. Les larges, grosses, et plates, spacieuses, et non rondes, ny agues, dangereuses. Et celles, qui se creuent, et purgent par dedans le uentre, combien que aucunement facent tumeurs par dehors, sont pernicieuses, et dangereuses plus, que celles, qui ne font eminance par dehors, et que la peau n'a descolorée.

Quelle

Quelle doit estre la matiere, qui
sort des Apostumes.

LA saniosite, et matiere, qui sort des apostumes blanche totalement, et non de diuerses couleurs, et non puante, est louable, et salubre. Celle, qui est autrement, de tant plus qu'elle est differente à la blanche, de tant est elle plus viciieuse, et mauuaise.

FIN DV PREMIER
LIVRE.

LE SECOND

LIVRE DES PRESAGES

D'hypocrates.

Et premierement de Hydropisie.



Toute maniere d'hydropisie avec maladie aque est perilleuse, & letale: car le patient est affligé, & moleste par fièvre uehement, & angoisseuse douleur: parquoy il meurt. Ceste maladie souuent aduient par passion epatique, qui est maladie du foye. Aussi il suruiuent des passions aux intestins, boyaux, & antrailles, & ueines mezeraiques, ou parties infernales, & ratte. Celle, qui uient des antrailles, ou mezeraiques, & inferieures parties est cõgneue par inflation des piedz, & flux de uentre diurne, & long: neantmoins les douleurs ne sont pacifiées, ou appaisées du uentre, ne le uentre desanflé, ny amoindry. Celle, qui prouient du foye, est congneue par signes sequentz: à scauoir, le patient a une toux seiche, & quasi ne crache rien, & a le uentre dur, & serré tellement, qu'il ne sort rien de son uentre, sinon à grosse peine, & travail: aussi a les piedz enflés: d'auantage sont tumeurs, & inflations maintenant au costé droit, tantost au senestre, puis se departent, & euanouissent: c'est à dire, qu'ilz uont, & uiennent.

GAL.

L'apostumation, & enflure des piedz, est generale à toutes hydropisies.

Les signes de uie, & de mort en
maladies agues.

Quand le patiēt a la teste froide, les mains, et piedz froids, & que le uentre, & costés sont ardentz, et bouillants, c'est signe de mauuaise maladie, & perilleuse. Mais quand le malade facilement se retourne de costé à aultre, & sans moleste: aussi quād tout le corps est esgallemēt chault, & suaue, est signe de salubrite, & securite. A l'opposite quād tous les membres sont pesantz, cōme les bras, iambes, & tout le corps, est a craindre. Et si avec ce les ungles sont liuides, ou plumbeux, lon peult prenoſti quer mort uicine. Et si les ungles, doigz, & piedz sont totalement noirs, n'est signe si dangereux, signamment quand apparoiſſent aucuns bons signes, comme si le patient ne sent grosse douleur, & legierement porte, & souffre son mal sans angoiſſe: toutesfoys ce, qui est noir, tombera, & le mal se euacuera par apoſtume.

Signes prins des Genitoires, & Verges.

Quand les genitoires, & uerges uirilles sont re-
traictés, & apparentement diminuées contre na-
ture, c'est signe de grosse douleur, & mort ſequente.

Signes prins par le dormir, & ſomme.

Quant au dormir, & ſommeil l'ung eſt naturel, &
ſalubre, l'aultre immaturel & uitieux. Le naturel
B ſe faiſt

se fait de nuict, & uveille de iour : & combien, que dormir des le poinct du iour iusque à huit, ou neuf heures du matin ne soit du tout salubre : toutes foyz si est il plus profitable, que de dormir au reste du iour : & si lon ne dort de iour, ni de nuict, est perillieux, & signe de grosse douleur, de folie, & alienation de sens, raison, & d'entendement presente, ou future.

De vuider le ventre, & matiere fecale.

Quant à la maniere de descharger le uentre, & l'allerger de superfluités, & excrementz, la meilleure est, quand en maladies le personnaige ensuit la constume, & heure, qu'il auoit en santé, & principalement selon la quantité, & qualité des uiandes prises. Car de tant plus y a dissonance, & difference, d'autant est pire. La naturelle egestion ne doibt estre trop liquide, ni aduste. Mais liée, & proportionée en couleur des uiades, & que le patient aille à selle sans peine, & sans douleur. Et si la matiere est liquide, n'est du tout à blasmer, quand uient sans grosse uentosité, & sans impetuosité, & non souuēt en peu d'heure. Car rendroit la personne lasse, debile, fachee, & en dāger de cheoir en syncope, & default. Item sur la fin de la maladie est louable, que l'egestion, & matiere fecale deuienne espesse, nō trop seiche, & de bonne couleur, cōme tirāt sur roux, brun, & ne soit fort puante. Si aussi sortent uers sur la fin du mal, n'est, que bon signe avec la matiere. Item en toute maladie doibt estre le uentre charnu, & non royde, ni plein de uent:

GAL.

L'expulsion de uers n'est louable, si ce n'est par crerication, & avec la matiere fecale,

Poppo

Opposite n'est bon signe. D'auantage l'egestion, & matiere fecale liquide, & aqueuse, blanche, ou pallide, ou grandement rousse, & spumeuse, dangereuse. La mortelle est noire, & liuide, ou uerte, puante, & uisqueuse. Et si elle est de plusieurs couleurs ensemble des predictes, n'est moins dangereuse, mais plus loingtaine. Aussi, ou il y a comme racleures de boyaulx, ou caruncules, & pellicules, toutes telles sont mortelles.

Du vent intestinal, & vterin.

LA uentosite enclose au uentre sortant doucement, & uolontairement sans mener bruyt, ne son, & sans restraindre le bas, & pertuis infernal, est la meilleure, & plus salubre. Celuy uent, qui avec son uolontairement sort, uault mieulx, que le retenir. Mais s'il sort avec son, & bruyt malgre le personnaige, signifie douleur, & tortion au uentre, ou alienation, & permixtion de raison.

GAL.
Car c'est signe, qu'il n'y a gueres de uentosite: Paulere signifie multitude, & grosse, ou vaporeuse ventosite.

De la ventosite causante inflation.

LEs douleurs recentes du uentre par inflation, & tumeur, & n'y a inflation, ardeur, ni chaleur, sont resolues, & gueries graillant, brulant, & menant bruyt par le uentre, signamment par benefice de uentre, ou par expulsion de uent, par bas, ou par urine, ou que changent de place, & descendent tout bas.

La iudicature de l'Vrine.

L'Vrine salubre en toute maladie doit au fond residence blanche, pineale, ou pyramidale ayant figure d'une poire, ou pomme de pin legiere, & continue: lors signifie breuite de maladie, & de tant plus qu'elle perseuere, de tant plus est elle louable, & seure. Et si aucunes foys, & par aucuns iours en la maladie est telle, en aucuns sans residence signifie prolixite de maladie, & moins de securite. Et de tant plus, qu'elle est differente à la premiere, de tant elle est pire.

L'urine rouge, ou trop rousse avec semblable hyppostase, ou residence legiere, & esgalle signifie la maladie plus longue, que la precedente, ou n'y a hyppostase: mais moins dangereuse.

Item quand au fond de l'urine sont resolutions grosses, comme bran, ou son, est mauuais signe: & pire, quand sont comme escaille de poisson. L'urine blanche, & subtile est tres maluaise: toutes foys la predite est pire, ou sont grosses resolutions.

La nuée pendente en l'urine signifie securite, si elle est blanche: car la noire est dangereuse. D'auantaige l'urine citrine tresclaire, & trop subtile en maladie signifie diurnite de maladie, et grosse indigestion, et crudite. Par quoy est à craindre, que le malade ne defaille auant, que les humeurs uiennent à parfaite concoction, et que meure le patient. L'urine de mort significatrice certaine, & fidele, est la puante, & aqueuse, & lutense comme boue, & fange, & tannée, brune, & la noire, & espesse.

D'auant

D'auantâige la noire tant en homme, que femme est tres mauuaise: & la subtile, & clere comme eau en petits enfans aussi le tale.

L'urine crue, & clere, & indigeste longuement telle perseuerant en maladie sans aultre mauuais signes, mais bons, & salubres denote apostume future, plus bas, que le diaphragme, & costés.

L'urine ayant come la toille de araigne supernatante signifie, que le personnaige mourra sec, et ethique, & liquefactiō de tout son corps. Fault aussi cōsiderer le lieu, et couleur de la nuée: car si elle est pres du fond de l'urine, n'est que bon signe ayant couleur tirāt sur le blanc. Et si elle est supernatante, et en hault, et noire, elle est dange reuse, et infidele. Finalement quant au iugemēt des urines garde toy sur tout, que tu ne soys deceu par la uecie: car par maladies d'icelle peuuēt telles apparoir. Et si la uecie n'est malade, assuree sera ton iugemēt: parquoy pèse à ce.

G A L.
La noire n'est mortelle quād par elle est le corps nestoyé, comme en 4. fiebure, & mundifié de matiēte, ou vecie.

Du vomissement bon, & mauuais.

Quant au momissement, le plus salubre, et louable est mixtionné, et composé de flegme, et colere, nō trop espes, ni trop uisqueux, ou superflu. Le colérique seul, ou flegmatique seul est uituperable: le uomissement uert, liuide, ou noir est trop plus dangereux. Et s'il est meslé de uert, liuide, et noir ensemble, il est mortel.

Item s'il est puant avec une des couleurs prenommées, signifie mort prochaine: car la puanteur en tout uo-

missément est uicieuse, & en tous excrementz.

De spuition, & crachat.

Quant à spuition, & crachat, est dict louable en toute maladies pulmonicques, & soubz les costés.

Quand uient es premiers iours, & commencement de la maladie facilement sans grosse peine, & labeur, & en couleur rougissant, ou meslé de sang, & bien digeste, non uisqueux. Et si tel n'aduiuent es premiers iours, & puis, que uienne avec laborieuse toux, n'est bon signe. Aussi lors le rouge, nō meslé avec le salubre, ou louable, est pernicieux. La spuition blanche uisqueuse, & globeuse est pernicieuse: mais la pure rouge, pire. La uerte, & spumeuse porte tesmoignage de dangereuse, & mauuaise maladie. La noire sur toutes est mortelle.

D'auantaige quand la matiere, qui se doibt purger par spuition, demeure sur le poulmon, & par la multitude, & plenitude empesche, & moleste le gozier, n'est chose seure.

Item la spuition clere, et rouge, ou sanguinolente en apostume, et inflammation pulmonicque uenant au commencement de la maladie es premiers iours promet securité, & adiutoire au patient. Mais si telle eiection continue iusque au septiesme iour, ou plus, est suspecte, et non seure.

Item toute spuition, par la quelle la douleur ne cesse, mais perseuere, n'est louable, mais uicieuse. Et combien que la noire (comme auons predict) soit mortelle, toutesfoys

tesfoys si la dou'eur cesse, par icelle est moins dangereu-
se, et plus salubre.

De sternuation seule, & avec corize
dict'e eumormire.

LA sternuation en toutes maladies agues, et aultres
quelque perilleuses qu'elles soyent (fors, que du
poulmon) et en quel temps, que ce soit, est louable, et pro-
fitable. Mais avec le catarre, et distillation, par le nez en
maladies pulmonicques, soit qu'elle uienne auant la mala-
die, soit quant & quant, est dangereuse.

GAL.

En maladie
pulmonicque
est mauuaise
sternuer. pour-
ce que esment
le poulmō grā
dement dont
est augmente
le mal. En tou-
tes aultres si-
gnifie fortē
vertu expul-
sive, & salut.

De Suppuration.

LA douleur predicte, laquelle ne cesse par spuition,
ni par benefice de uentre, ni par phlebotomie, ni
par medecine laxatiue, ou bon regime, signifie, que l'apo-
stume uient à suppuration, et matiere. Et quand l'apo-
stume se rompt, et purge (la spuition estant colleri-
que) soit que la matiere de l'apostume uienne
avec la spuition, soit qu'elle sorte seule, c'est
chose pernicieuse, signamment quand ce
aduient, et commence au septiesme
iour, ou apres, et est à craindre,
que le patient ne meure le
quatorziesme iour. Si
n'y suruiēt aultre si-
gne salubre, et
louable.

Les signes de bon espoir, & louables
aux predictes maladies, & aultres.

Quand le malade soustient uirilement le mal, si degrement, & à son aise a son aleine, si facilement, et sans douleur aspire, & respire: s'il ne sent aucune douleur, si sans grosse difficulte crache, si remue tout le corps, & tous ses membres à son plaisir sans greuance, ou fascherie: & qu'il n'y a chaleur exuperante, ou superflue en luy, sans grosse soif, ou alteration: d'auantaige, que l'urine, et tous excremens par tous cōduictz sōt en deue quātitē, & qualite de louable couleur, et substance, cōme matiere fecale liée, conioincte, non trop dure, mais cōme en sante, la sueur uniuersale, & tepide avec alleuuation. Item spuition facile, & louable: le somme nocturnal, & ainsi des aultres, cōme auons predict au long.

Les signes opposites de desespoir.

Si le mal est intollerable, & importable douleur, chaleur adurante, soif extreme, toux cōtinue, rigueur de membres, aspiration languide, spuition fetide, & puante urine en petite quantite, matiere fecale, liuide, liquide, ou aqueuse, & spumeuse, & frequente sueur particuliere, & froide sans repos de iour, ni de nuict: les mains, piedz, & front froidz, se deiectant ca, & là. Et tous aultres signes mau'uais prins en la face: par lesquels tous, ou plusieurs prenostiqueras la mort subite, ou tardie sans pouuoir tomber en diffamation, & deshonneur

honneur: mais estre en grosse reputation, & sublimite.

Les signes du temps, & iours de la rupture des Apostumes.

A Vlcunes apostumes se rompent, & persent le xx. iour. Les aultres different iusques à xl. iours. aultres attendent le lx. Parquoy pour bien presagir enqueras le premier iour, & principe de la maladie: ascauoir quand a premierement senti le patient chaleur, et fiebure, aussi rigueur, ou horripilation, et pesanteur, et aussi la douleur, et punction. Lors commenceras à compter les iours, et par ce moyen pourras indubitablement prenostiquer.

Item prediras, s'il y a apostume en l'ung des costés, ou aux deux par ce moyen. Interroge le patient, s'il sent douleur, & chaleur en l'ung plus, que en l'autre: puis faiz, qu'il se couche sur le sain costé, & s'il sent grauite, et ponderosite, s'ensuit, que le dict costé, ou est la ponderosite, est apostumé, et là est la collection, et saniosite: et s'il sent aux deux douleur, chaleur, et grauite, s'ensuiuroit, les deux estre apostumés.

Tu cõnoistras, l'apostume, et collection estre meure, & rompue, & la matiere retenue au membre apostumé, quand la fiebure ne cesse, et que de iour est moindre, que de nuict, & que le patient sue abondamment, & ne cesse de toussir, mais ne iette comme rien.

Item les yeulx luy parfondent en la teste, & a les ioues rouges, & les ungles deuiennent courbes, & les sommités, & extremités des doigx luy brulèt, et a perdu

l'appetit, & les piedz enflent, & à quasi par tout le corps uescies, ou pustules, ces signes se demōstrent, quand la saniosite, et apostume est diurne, et sont signes fideles de sante future. Pour dōcques prenostiquer, si tost, ou tard se rompra l'apostume, cōsidere le deuant dict: car si des le commencement, & premiers iours la toux presse le malade avec douleur, & excreation fr̄equente, ou sp̄uition avec difficulte d'aleme, iuge, que l'apostume se rompra dedans uingt iours.

Et si l'opposite aduient, que les signes soyent retardés, sera prolongée la ruption. Et d'aultan, que les signes sont forts, ou foibles, de tant la ruption est acceleree, ou retardée.

Et pour scauoir, s'il y a danger, & peril, ou probabilitẽ de sante, considere, si au iour, que l'apostume est rompue, la fiebure cesse, & la soif, & l'appetit reuient, et que la matiere fecale est liẽe. Et la matiere de l'apostume est blanche, & molle esgallement, et sort sans douleur, & sans forte toux, ces choses cy sont signes fideles de sante.

A l'opposite, quand la fiebure ne cesse, ou tantost reuient avec grosse soif sans appetit, & la matiere fecale aqueuse la sp̄uition liuide uerte, & sp̄umeuse, & en partie flegmaticque, pourras prenostiquer la mort.

Et si aucuns bons signes aduiennent, & aultres mauuais, compare les ungs aux aultres, & diligẽtẽment ru mine auant, que prenostiquer affin d'euiter infamie. Car les ungs meurẽt tantost, les aultres sont prolongés: puis à la fin meurent, les aultres puis à la fin retournent à sante.

Des apo

De Apostumes, qui viennent vers les
aureilles en pulmonicque
palsion.

Q Vand suruiët apostume derriere, ou soubz l'aureil
le au malade de peripleumonie, & que la dicte
apostume uient à maturation, & se purge, & engendre
fistule, saulue le patient. Et pour prenosticquer, quand
ce aduiendra,

Note ce, qui s'ensuit : Quand en la dicte maladie la
fiebre continue, & est permanente douleur, & la spui-
tion impertinente, et non louable, & le uentre ne faict
son debuoir, euacuent la colere ou liquide matiere,

Et l'urine est en petite quantite avec abondante residen-
ce, mais tous aultres bons signes demonstrantz securite
sont presentz, à lors prediras apostumes futures au pres
de l'oreille. Et uient la dicte apostume soubz l'au-
reille, signamment quand y a inflammation soubz
les costés, & dyaphragme. Et si n'y a au dict

lieu inflammation, ni douleurs, mais le
patient a difficulte d'aleine, la
quelle sans cause mania-
feste, & de par
elle s'en ua:

lors

l'apostume uient dessus l'aureille.

Des pu

Des Pustules, ou Apostumes, qui
viennent aux piedz.

EN uehementes, et perilleuses peripleumonies pour le profit, et sante du patient suruiuent pustules, et uescies aux piedz : et principalement, quand est tost muée la spuition de rouge en blanc, est tres certain signe de sante: car par telle spuition la pustule, et douleur cesse: mais si la spuitiō ne tourne de rouge en blanc, et que en l'urine ne soit bonne, & louable residence, le patient sera en danger de deuenir boiteux par contraction de nerfz, et iointure, ou est la dicte pustule, et uescie.

Si la dicte pustule, ou petite apostume du pied se occulte, & euanoisse, ou que uoisc, et uienne sans purgation, ou maturation: ou biē que l'apostume du costé dicte peripleumonie (car elle est au poulmon) n'est purgée par louable spuition, et que la fiebure demeure, le patient est en danger de perdre son entendement, puis mourir. En oultre, des predictes maladies pulmoniques, ceulx, qui approchent de uicilleſſe nō extreme (cōme de cinquante ans) meurent plus souuent, que les plus ieunes. Et les ieunes gens meurent plus souuent d'autre maniere de apostume. D'auantaige le personnaige ayant grosse douleur plus bas, que le lombril au uentre, ou tirant sur la cuisse avec fiebure, si la douleur laissant son lieu monte soubz les costes, est fort dangereuse: car lors ang, ou deux signes mauuais le iugent à mort. Mais si sont plusieurs bons comme spuition facile, blanche, & nō puante, est signe de euasion. La rouge, et puāte est mortelle: et s'il

n'y a aucun mauuais signe, y a esperance, que le cas uendra à suppuration, & sanation.

Des signes par la uescie.

LA durte, & grosse douleur de la uescie est mortelle: signamment avec fiebure indeficiente. Et souuent est avec constipation de uentre, parquoy est mortelle sans remission. Mais si l'urine est comme matiere d'apostume avec residence blanche, & pineale, & par ce la douleur cesse, y a espoir: mais si la douleur n'est pacifiée, & la uescie mollifiée, & la fiebure ostée, par telle urine iuge mort proxime. Et ce aduient plus aux enfans de sept à quinze ans, qu'à aultres.

Cy finit la seconde particule des Presaiges
du Diuin Hyppocrates.

LE TIERS LIVRE DES
Presages du Diuin, & maistre des
Medecins Hypocrates.

Et premierement des Fieures.



A fin de la fiebure aduient à lung (et ce
à la mort) à l'autre à la uie en ung mes-
me iour. Et si elle est à la uie, tous bons
signes se demonstrent aux premiers
iours, par lesquelz prenostiquer la
fin, au quatriesme iour, ou deuant: et si la fiebure est à la
mort, tous mauuais signes donneront tesmoinage de la
mort au quatriesme iour, ou auant. Le premier periode,
et iour de iudicature, ou de cretication, et fin, ou terme de
la fiebure est (come auons dict) au quatriesme iour. Le se-
cond au septiesme, le sixiesme au uingtiesme. Lequel nom-
bre par quaternaires se augmente, et est produict ius-
ques au uingtiesme en la fiebure, et aultre maladie ague.
Et se doibt compter, par quaternaires entiers, car l'année
et moys ne peuuent estre comptés par nombre de iours
complets, et entiers, comme en ceste computation faisons
trois semaines de uingt iours, qui est dict moys, ou an
lunaire.

Ainsi selon ceste computation, et augmentation la
premiere

premiere sera le uingtiesme iour, la seconde le quarantiesme, le tiers le soixantiesme iour. Et est asscauoir, que les maladies croniques, & de longue durée sont de plus difficile iudicature, congnoissance, & prenostique. Parquoy fault il regarder de plus pres: car leur principes sont occultes, et ne demonstrent signe de digestion. Si ainsi specules de pres, pourras prenostiquer, à quelle fin paruiendra la fiebure.

Item la fiebure quarte obserue la matiere predite en ses cretications, & iudicatures: ou sepmaines iudiciaires: car ce, qui est faict aux aultres, par nombre de iours en ce ste ce faict par nombre de periodes, et acces.

Les courtes, & briefues maladies sont de plus facile presage, & congnoissance. Car tost, & est premiers iours se changent de bien en mieulx, ou de mal en piz: les salubres sont congneues, par ce, que le patient a bonne, & facile aleine, et ne sent douleurs, et dort de nuit, & aultres telz signes salutaires, les mortelles ou dangereuses lon congnoist, quand le patient a difficulte d'aleine, grosse douleur, & ne repose de nuit, avec aultres signes uitieux, par lesquelz lon prenostique la mort.

Affin doncques de bien presagir, considereras tous les signes de digestion, le temps, heures, et iours, que sont plus affligés les malades.

Et si suruient maladie aux femmes en leur enfantement, ou tost apres, que seront accouchées, commence de compter aux iours de l'enfantement, et non au iour, que commence la fiebure.

GAL.

Ainsi que le
iiij. iour est iu
dicare du vij.
en fiebure co
tinues ainsi est
le iiij. peroi
de iudice du
vij.

Item à generalement parler, quand l'on sent douleur
uehe

G A L.
Par fois com-
mence fiebre
deux ou troys
iours apres l'è-
fantement : &
ceulx, qui cō-
mencent a com-
pter à lors,
faillent. Hyp-
pocras n'a ri-
omis des cho-
ses necessaires
à curation.

uehement en la teste continue avec la fiebre, s'il suruiuent
quelque mauuais signe avec les predicts, c'est signe de
mort: mais si la douleur, et fiebre dure, & perseuer
iusque au uingtiesme iour, tu pourras presagir flux de
sang par le nez, ou apostume aux parties inferieures du
corps, s'il n'y a aultre signe mortel. Aulcunes foys aussi des
le commencement, ou es premiers iour aduient flux de sang
par le nez, ou apostume: principalement quand la dou-
leur est au front, & parties circūuoyfines. Et est à noter,
que le dict flux de sang plus souuent aduient aux gens sur
l'age de trente ans, ou trentecinq: & aux plus uielz, apo-
stume, et collection.

Item quand en la fiebre continue le patient a grosse
douleur, & apostume en l'aureille, est dangereux signe,
car souuent le personnaige pert sont entendement, &
meurt. Et pource lon doit bien speculer les bons, &
mauuais signes des le principe, et commencement de la ma-
ladie: car souuent dedans sept iours ieunes gens malades
de ceste maladie meurent: mais les uiculx ne meurent si
tost: car en eulx ne peult estre la fiebre si ardente, ni alie-
nation d'esprit. Parquoy l'apostume uient à maturation,
et suppuration, et sante: mais s'ilz recidiuent, souuēt me-
rent uielles gens. Et les ieunes meurent auant, que l'apo-
stume de l'aureille uienne à maturation, si non quand ce,
qui en sort, est blanc, & digeste avec aultre bons signes:
parquoy retournent à sante.

Item si en fiebre continue, & ague maladie sur-
uiuent, ulceration de gosier, ou gorge, est tres perilleuse,
& mauuaise: signamment quand suruiennent aultres
signes

signes malings, & mortelz.

De la Quinance, ou Quilance.

Toute maniere de quilance est perilleuse : car elle tue tost le personnaige : sur tout quand il n'y a apparence d'apostume, ou tumeur sur le col, n'y au gosier, & qu'il souffre angoisseuse douleur, & ne peult aspirer, ne respirer, ou auoir son aleime : lors elle tue le patient, au premier iour, second, tiers, ou quart au plus tard.

Aussi celle, ou apert eminance, & grosse rougeur avec uehement douleur n'est moins dangereuse, mais est plus tardive, & loingtaine. Mais celle, ou il y a eminance, & rougeur sur le col, & au gosier, & signammēt à la poictrine, est plus tardive, & moins dangereuse, que les deux superieures especes. Et si elle ne se cache, & remēt au dedans, c'est bon signe. Mais si la dicte quilance, & tumeur se mussē, & non en iour de cretication, & qu'elle ne se purge par dehors, ou par la bouche, & crachat, combien que se sente allegé le malade, & sans grosse douleur, c'est mauuais signe, & mortel, ou signe de recheute.

C'est doncques meilleur signe, & chose moins dangereuse, quand la tumeur, & rougeur se demonstrent par dehors. Car si elle descend au poulmon le patient est en danger de perdre son entendement, combien que aucunes foys la dicte collection uienne à suppuration, matiere, & purgation.

De l'Vuule, Gargasson, ou
Garguette.

C'est chose dangereuse, & mortelle d'inciser, & ouvrir l'vuule, gargasson, ou garguette enflée, ou grosse, & rouge: car ou elle se tourne en apostume, & inflammation, ou s'ensuit gros flux de sang. Pource que lon labeure par aultre uoye de curer, & guerir le patient. Et si lon ne peult, & que soit liuide, ou pasle, & la partie superieure soyt petite, & non tumide, ou enflée, mais la partie inferieure tumide, & ronde, sans danger la pourras inciser, & ouvrir, & ainsi guerir. Et si tu congnos, que le patient ne soyt en danger de tomber en suffocation, & mourir, le principal sera de purger le uentre, si tu as l'opportunitè, & temps de ce faire.

Hippocras retourne à parler
des Fiebres.

Quand la fiebre ague ne cesse, ni donne repos au patient à l'ung, ou plusieurs iours de cretication sans aultres bons signes, pourras prenostiquer recidivation, & rechute. Et en fiebre avec signes salutaires comme quand le patient n'est molesté par grosse douleur, ni labeur, & n'y a aultre cause manifeste, pourras prenostiquer apostume, & grosse inflammation aux ioinctures, & parties inferieures, & principalement à ceulx, qui ne passent trente, ou trente cinq ans.

Toutesfoys peu souuent aduient le dict apostume dans le uingtiesme iour de la fiebure: signammiẽt aux plus eagés, combien que la fiebure dure plus longuement, & est plus iogue aux uieulx, qu'aux ieunes. Coustumiere-
ment aussi aduient telle apostume en fiebures continues, & aussi aux fiebures, lesquelles ne tiennent ordre, n'y maniere d'exces, ou paroxisme, dictes errabodes, ou uagabodes, assauoir affligeant deux, ou trois foys le iour: puis cessent aultant, puis elles retournent sans tenir aucun ordre, souuent se transmuẽt en fiebures quartes, signammiẽt sur Automne. Et tout ainsi, que plus souuent aduient la predictẽ apostume aux ieunes gẽs, aussi aux uieulx aduient la fiebure quarte. Et quand à la nature des apostumes, coustumierement aduient plus en yuer, que aultres temps, mais sont plus diurnes, & prolixes, & moins retournent, ou recidient.

Signes de uomissement en fiebures.

Quand il semble au febricitant, que mouches volent, & choses noires apparoiſſent deuant ses yeulx avec douleur de teste sans aultres signes mauuais, ny mortelz, pourras presagir uomissement de colere citrime, signammiẽt quand le patient sent douleur à la bouche de l'estomach, ou orifice. Et si sent avec ce rigueur, ou frisson, & froidure aux parties basses soubz les hyppochondres, de tant plus sera accelerẽ le uomissement. Et si le patient lors mange, & prend reſectiõ, y uomira incontinent.

Et pour le plus apertement presagir, quand la douleur de la teste moleste la personne des le premier iour de la siebure, & est augmentée le quatriesme, ou cinquiesme iour, au septiesme finira la siebure, & sera guerie la personne. Et si la douleur commence le tiers iour, & est augmentée au cinquiesme, ou septiesme, la siebure finira le neufuiesme, ou unxiesme iour: & si la douleur commence le cinquiesme iour, avec urine conuenable, & aultres bons signes finira le quatorziesme iour: & ce aduient tant en femmes, que en hommes, & signamment en siebures tierces à gens eagés de trente ans. Et aux plus ieunes en siebures continues, & urayes tierces. Et quand en la siebure avec douleur de teste n'apparoissent mouches, ne choses noires, mais coruscantes, & resplendissantes, ou luisantes comme lampes, & coruscation, ou esclaire, & que le patient sent tortion, & tumeur, ou inflation soubz l'ung des costés en lieu de douleur d'inflammation, & de uomissement aura flux de sang par le nez: & ce aduient principalemēt aux ieunes gens soubz trente ans: & au plus uieulx plus souuent uomissement: & les ieunes enfans iusques à sept ans par siebures agues tombent en spasme, signamment quand sont constipés, & durs de uentre, & ne dorment, mais s'e spouuētent, & pleurent, & changēt de couleur, maintenant en pasle, tost en rouge, ou uert liuide: mais ceulx, qui passent sept, ou huit ans, peu souuent tombent en spasme, s'il n'y suruiuent quelque signe perilleux, ou d'agereux, comme de phrenesie.

La conclusion de tout le Liure.

OR doncques pour finale conclusion, que le Medecin labeure de cōgnoistre les malades, & maladies, aussi les accidēts d'icelles bōs, & salubres, mauuais, & mortelz tant en enfantz ieunes, que uieulx, & en toutes infirmités signamment agues, affin de prenommer à l'ung la uie, & à l'autre la mort, aussi la breuite, ou proximité d'une chascune maladie, & les transmutations, & aultres inconuenientz, accumulant, & cōgregeant tous signes bons, & mauuais, & considerant, & comparant les superiures, & inferiures, pouuāt prosterner, ou sauuer le patient. Et ce par l'urine, matiere fecale, spuition, sueur, & aultres excrementz, & superfluités sortants du corps. D'auantaige soyt exercitē à considerer, & speculer, ou noter tant le temps des iours preteritz, que presentz. Assauoir la uariation du temps par uentz, froidure, chaleur, secheresse, & humidite. Et cōdition de l'an total, & de ses quatre parties, c'est à scauoir l'yuer, l'este, l'automne, & printemps. Car combien, que toutes maladies peuuent aduenir en tous temps, toutes foys les unes plus specialement aduiennent en l'ung des temps, que en aultre, & aucuns signes bons, ou mauuais en ung iour, ou heure, que en aultre. Et affin que ne doubtēs, ou craignes de presagir, & prenostiquer selō la doctrine, & enseignemens prescripts, sache, qu'auons ces choses icy experimentē en Ethiopie, en Moretanie, en Lybie, en Lisle de Delos, en Esparie, en Sithie, brief en Orient, Occident, Midy, & Septiētrion. Et auons trouuē

la uerite comme l'auons escript: & pource ne te deſſere
point, mais prens courage, & te exercite à congnoiſtre
les choſes dictes. Et facilement paruiendras à plus gran-
de congnoiſſance des ſignes, que tu ne penſes, & t'eſmer-
ueilleras, comment ces choſes peuuent ſi bien quadrer, &
ſi urayement aduenir: & ſi bien rumines mes docu-
mentz, finalement ne doute, qu'il te ſuruiennēt aucu-
nes maladies, des quelles tu ne doibues, ne peuues auoir la
congnoiſſance, & ce par leſdictz enſeignements. Si bien
les entends, & ſignamment de celles, qui obſeruent iours
d'affliction, & maniere de paroxiſme, & qui ſe finent en
certain nombre de iours, & certaine eſpace, cōme auons
dict, ſi de pres tu ueulx ſpeculer, & prendre garde.

F I N.

Imprimé à Lyon par Eſtienne Dolet,
pour lors demeurant en rue Mer-
ciere à l'enſeigne de la Dolois-
re. L'an de grace mil
cinq cents quaren-
te & deux.

